

Ambiente di Dande na Paradera



PARADERA - Diadomingo ultimo e bario di Paradera a luci cu e gran celebracion di dande cu a tuma luga na rotonde di Paradera.

Pa 5:30 di atardi por a mira con tur bisiña y amigonan a cuminsa yega cerca pa asina apoya e celebracion aki cu a tuma luga pa di 2 aña. E rotonde y e plaza a wordo decora cu luz pa asina trece e ambiente. Nos rey di dande Jonathan Croes y nos reina di dande Julisa Boekhoudt tambe tabata presente na e celebracion aki.

Nan a wordo acompaña pa Alma Folklorico. Despues por a nota con e bisiñanan entre nan a cera un banda den pura pa asina tambe anima e publico presente. Na final e anochi a wordo cera cu e musica di Zonido di Antaño. E motor tras di e evento aki ta Luigui Rasmijn kende ya di comienso di december a cuminsa prepara tur cos. Un anochi unda sigur full e bario a gosa di e ambiente. Ta di spera cu e evento aki por haya apoyo di mas comerciante di Paradera pa asina e por bira algo mas grandi y cu por keda celebra tur aña.

